

Na osnovu člana 60. stav (1) tačka p) Zakona o visokom obrazovanju ("Službene novine Tuzlanskog kantona", broj: 7/16, 10/16, 5/17 i 15/17), a u vezi sa članom 84. istog Zakona i članom 268. Statuta Univerziteta, Senat Univerziteta u Tuzli na sjednici održanoj 16.10.2019. godine, donio je

**Pravilnik
o regulisanju angažovanja nastavnika i saradnika Univerziteta u Tuzli na drugoj
visokoškolskoj ustanovi/ sa drugim pravnim licima**

Član 1.

(1) Ovim Pravilnikom uređuju se uslovi, postupak i druga pitanja vezana za :

-davanje saglasnosti za izvođenje nastave/vježbi akademskog osoblja Univerziteta u Tuzli (u daljem tekstu: Univerzitet) na drugoj visokoškolskoj ustanovi, na sva tri ciklusa studija,

-davanje saglasnosti zaposlenim nastavnicima i saradnicima /izabranim bez zasnivanja radnog odnosa na Univerzitetu za zaključivanje ugovora o radu sa nepunim radnim vremenom na drugoj visokoškolskoj ustanovi, odnosno kod drugog poslodavca koji obavlja registovanu djelatnost Univerziteta/njegovih fakulteta (naučnoistraživački rad, realizacija programa obrazovanja odraslih),

-davanje saglasnosti za učešće u radu komisija u postupcima sticanja naučnog stepena doktora nauka i mentorstvo za sticanje naučnog stepena doktora nauka /magistra struke, na drugoj visokoškolskoj ustanovi, koji nisu definisani alinejom (2) ovog stava.

(2) Drugom visokoškolskom ustanovom, u smislu prethodnog stava ovog člana, smatra se javna visokoškolska ustanova koja je potpisnica sporazuma o međusobnom razumijevanju i saradnji, zaključenog na nivou Rektorske konferencije Bosne i Hercegovine ili druga visokoškolska ustanova u inostranstvu.

Član 2.

(1) Takmičenje zaposlenika sa Univerzitetom nastaje ako se zaposleni nastavnik/saradnik angažuje za izvođenje nastave na drugoj visokoškolskoj ustanovi bez prethodnog odobrenja Senata, u skladu sa ovim Pravilnikom.

(2) Nastavnik/saradnik izabran u naučno-nastavno zvanje, bez zasnovanog radnog odnosa na Univerzitetu može izvoditi nastavu na drugoj visokoškolskoj ustanovi definisanoj u članu 1. ovog Pravilnika samo uz prethodno odobrenje Senata Univerziteta.

Član 3.

(1) Nastavnici Univerziteta mogu se angažovati u izvođenju nastave na visokoškolskoj ustanovi iz člana 1. stav (2) ovog Pravilnika do najviše 6 sati nastave, prosječno sedmično na godišnjem nivou.

(2) Zaposleni nastavnik/saradnik Univerziteta za čijim radom postoji potreba u nastavnom procesu na Univerzitetu sa maksimalnim opterećenjem, utvrđenim Standardima i normativima visokog obrazovanja u TK, ne može dobiti saglasnost za angažman na drugoj visokoškolskoj ustanovi ukoliko odbije izvođenje nastave na Univerzitetu.

(3) Nastava na drugoj visokoškolskoj ustanovi izvodi se izvan redovnog radnog vremena na

Univerzitetu (subotom i/ili nedeljom i/ili u vrijeme godišnjeg odmora), a evidencija o datim saglasnostima vodi se na fakultetu/Akademiji i u Uredu za nastavu i studentska pitanja Univerziteta.

Član 4.

(1)Zahtjev za davanje saglasnosti za izvođenje nastave na drugoj visokoškolskoj ustanovi zaposleni nastavnik/saradnik/izabran bez zasnivanja radnog odnosa podnosi Senatu Univerziteta, na početku nastave u semestru, uz koji prilaže prethodno pribavljeno mišljenje naučno-nastavnog/umjetničko-nastavnog vijeća fakulteta/Akademije kao i zahtjev javne visokoškolske ustanove koja je iskazala potrebu za njegovim angažovanjem u izvođenju nastave.

(2)Zahtjev iz stava 1. ovog člana treba da sadrži naziv visokoškolske ustanove , naziv nastavnog/ih predmeta, fond sati predmeta, semestar u kojem se angažuje kao i izjavu da će nastavu realizirati u dane vikenda/godišnjeg odmora.

Član 5.

Nastavnik/saradnik, zaposlenik/izabran u zvanje bez zasnivanja radnog odnosa koji nije pribavio saglasnost iz člana 4. ovog Pravilnika, ne može, u svoje ime i za svoj račun, kao ni za račun druge javne visokoškolske ustanove, učestvovati u izvođenju nastave na istoj.

Član 6.

(1)Ako zaposlenik postupi suprotno članu 5. ovog Pravilnika čini, svojom krivicom, u smislu Zakona o radu, Statutu i Pravilniku o radu Univerziteta, težu povredu radne obaveze.

(2)Ako izabrani nastavnik/saradnik Univerziteta koji nije u radnom odnosu na Univerzitetu postupi suprotno članu 5. ovog Pravilnika, ne može učestvovati u realizaciji nastave na Univerzitetu, ne može biti biran niti napredovati u više naučno-nastavno zvanje.


Član 7.

Ovaj Pravilnik stupa na snagu danom donošenja.

Član 8.

Stupanjem na snagu ovog Pravilnika prestaju da važe Pravilnik o regulisanju angažovanja nastavnika i saradnika Univerziteta u Tuzli broj: 03-7650-6/11 od 21.09.2011. godine, broj: 03-5490-3/15 od 16.10.2015. godine i broj: 03-7169-9/16 od 12.10.2016. godine.

UNIVERZITET U TUZLI
Broj: 03-5340-2/19
Tuzla, 16.10.2019. godine



PREDSJEDAVAJUĆI SENATA:

[Handwritten signature]
Dr.sc. Nermina Hadžigrahić, redovni profesor